

14. Marts 2015

Inatsisartut suleriaasianni § 36 naapertorlugu apeqquteqaat aallaavigalugu oqallisis-siaq imaattoq matumuuna saqqummiuppara:

**Uumasuutillit tunisassiornikkut, ingerlatsinikkut malitsigisaanillu uumasuutit pissarsissutaanerat annertusarniarlugu pissutsit atugaat pillugit pitsanngorsaaniisaq pillugu apeqquteqaat aallaavingalugu oqallinnissamik siunnersuut.**

(Inatsisartunut ilaasortaq Suka K. Frederiksen, Siumut)

Siumumiit maluginarparput nunalerineq pillugu politikkimik nassuiaat saqqummiunneqartoq kingulleq 2007-meersuummat, tamaammat nuannaarutigaarput nunalerineq pillugu matumani oqallissaarummik saqqummiussisoqarmat.

Uummasuuteqarnermi pineqarput savaateqarnermik inuussutissarsiuteqartut, saniatigut sumiiffinni marlunni tuttuuteqarneq, nutsaattullu nersutaateqarneq ingerlanneqarput.

Nunarput imminut inuussutissatigut sapinngisamik annerpaamik pilersornissaanut Siumumiit anguniagaqarnerput qularutigineqassanngilaq, tamanna anguniarlugu ajornartorsiutit assigiinngitsut aaqiiviginissaanut suliniutit ingerlanneqartut Naalakkersuisup akissuteqaatimini oqariartuutigai.

Aningaasarsiornikkut killiffimmi takutinneqarpoq pisussaaffeqarfiusumik ingerlariaqqittoqartariaqartoq, ajornartorsiutit piusut arlaqarput sinaakkusiornermi eqqumaffigineqartariaqartut, taaneqarsinnaallutik:

- Inuussutissarsiut sapinngisamik aningaasarsiornikkut nammineersinnaanerulerunissaanut aqqtissiuinissaq. Ilinniarsimasut nutaaliornissaanut periarfissiinissaq.
- Inuussutissarsiut amerlisaanikkut ineriartorfissaqarnissaanik aqqtissiuinissaq, ilanngullugu neriniartitsivinnik aqutaanerusumik ingerlatsisinnaanissaq.
- Inaatit aserfallassimaleqqasut tullerriaarinikkut iliuuseqarfigineqarnissaanut pisussaaffiliunissaq, misileraanikkut aningaasartuutikillisaaneq pimoorullugu aqqtissiuinissaq, tassani ilaatigut Upernaviarsummi aaqqissuuseqqinnikkut alloriarfiusinnaasunik ujartuinissaq.
- Neqi A/S akilersinnaanerusumik ingerlatsiviulernissaanut iliuusissanik ersarissumik suleqatigiiffiusumik ingerlatsinissaq, ass. Neqit ilivitsunngorlugit avataanniit tikisillugit suliareqqiivittut annerusumik ingerlatsinissaq il.il.
- Nunatta nerisassatigut imminut pilersornissaa eqqarsaatigalugu nunalerinermut aningaasaliisoqarnerusariaqarpoq, tamatumani qinigaaffimmi siuliini Siumup isumani allanngortinnagu kaammattuutigaa aningaasanik nunalerinermut immikkoortitsisoqarnissaa Aningaasanut Inatsimmik suliaqarnermi pingajussaaneerinnittoqartinnagu.

Siumumiit nuannaarutigaarput qilanaaralugulu maanna naalackersuisunit suliniutigineqarmat inuussutissalerinermut oqartussaaffiup nunatsinnut nuutsinneqarnissaat.

Siumut isumaqarpoq nunatsinni sapinngisamik namminersorlutik suliaqartut peqatigalugit nutaanik iliuusissamik ingerlatsisoqartariaqartoq.

Siunnersuuteqartup inuussutissarsiummik ingerlataqartut ajornartorsiutaat pillugit tikkuusivoq, taamaattumik aqutaasumik ajornartorsiutit qaangerniarlugit inerisaanissamik iliuuseqarnissaq pisariaqarpoq.

Tamakkulu siuliini taakkartukavut timitalerneqassappata, tamatullu nunatsinni aningaasat pisariaqartitavut kaaviaartut amerlisarneqassappata nunatta imminut pilersornerulernera saneqqussinnaangilarput.

Taamaattumik suliat sukkanerusumik ingerlanissaat pisariaqarluinnalersimasoq eqqarsaatigalugu Naalakkersuisut kaammattorusuppagut katagaatinngitsumik suliat ingerlassappata Savaatillit Peqatigiit Suleqatigiissut (SPS) qanimut suleqatigilluinnarlugu suliamik ingerlatseqqullugit.

Taamatut oqaaseqarluta Inatsisartunut ilaasortaq Suka K Frederiksen qutsavigaarput apeqquteqaat aallaavigalugu oqallinnissamik siunnersuuteqarmat.

Qujanaq.

Anders Olsen

Siumut